

Ma'rad Al-Kutub UNISSA galakkan budaya ilmu



REKTOR UNISSA, Dr. Haji Norarfan semasa majlis pertukaran bahan terbitan antara UNISSA dan Kolej Universiti Perguruan Ugama Seri Begawan (KUPU SB) yang diwakili oleh Pemangku Timbalan Ra'es KUPU SB, Dr. Abang Haji Hadzmin bin Abang Haji Taha.



REKTOR Universiti Islam Sultan Sharif Ali (UNISSA), Dr. Haji Norarfan bin Haji Zainal semasa melawat pameran dan jualan buku di Ma'rad Al-Kutub.

Berita dan Foto : Ak. Syi'aruddin Pg. Dauddin



ANTARA yang hadir pada majlis tersebut.

GADONG, Selasa, 30 Januari. – Pepatah ada mengatakan 'Membaca jambatan ilmu', pepatah ini membawa maksud tabiat suka membaca dapat membantu kita menambahkan ilmu pengetahuan dan ini amatlah wajar untuk dijadikan azimat dalam kehidupan seharian dalam memupuk budaya membaca dalam kalangan masyarakat negara ini.

Perkara tersebut dijelaskan oleh Rektor Universiti Islam Sultan Sharif Ali (UNISSA), Dr. Haji Norarfan bin Haji Zainal semasa menyampaikan ucapannya selaku tetamu kehormat dan seterusnya merasmikan Ma'rad Al-Kutub (Pesta Buku) yang berlangsung di Perpustakaan UNISSA, Gadong, di sini.

Majlis yang diadakan melalui Bahagian Perpustakaan UNISSA

serta Pusat Penyelidikan dan Penerbitan tersebut diadakan selama tiga hari di Perpustakaan UNISSA bermula hari ini hingga 1 Februari 2018 dari jam 8.00 pagi hingga 4.30 petang.

Atur cara juga diisikan dengan penyampaian sijil-sijil penghargaan yang disempurnakan oleh tetamu kehormat kepada agensi-agensi serta peserta yang terlibat dalam menjayakan majlis tersebut dan diselenggarakan dengan majlis pertukaran bahan terbitan di antara UNISSA juga Kolej Universiti Perguruan Ugama Seri Begawan (KUPU SB).

Ma'rad Al-Kutub adalah bersempena dengan 10 Tahun Penubuhan UNISSA yang antara lain bertujuan untuk menghidupkan lagi suasana perpustakaan dan mengalakkan

budaya ilmu dalam kalangan pelajar dan tenaga akademik.

Sebanyak 10 agensi kerajaan dan empat bukan agensi kerajaan menyertai jualan buku, iaitu KUPU SB; Pusat Da'wah Islamiah; Pusat Sejarah; Pusat Pengajian Strategik dan Dasar (CSPS); Jabatan Mufti Kerajaan; Jabatan Muzium-Muzium; Dewan Bahasa dan Pustaka serta Pusat Standard Kebangsaan JPM; Al-Araby Bookstore; Asfi Book World; Syarikat Seri Sikuna dan Umitech.

Juga hadir ialah Timbalan Rektor UNISSA, Dr. Haji Mohammed Hussain bin Pehin Penyarut Haji Ahmad; Pemangku Timbalan Ra'es KUPU SB, Dr. Abang Haji Hadzmin bin Abang Haji Taha; serta pegawai-pegawai utama UNISSA dan KUPU SB.

Sabar menghadapi musibah

FIRMAN Allah Subhanahu Wata'ala dalam Surah Al-Baqarah, ayat 155 yang bermaksud :

"Dan sesungguhnya Kami pasti akan menguji kamu dengan sedikit perasaan takut dan kelaparan dan kekurangan harta benda dan jiwa dan buah-buahan (kerana Kami hendak melihat sama ada kamu sabar atau tidak atas ujian itu). Dan sampaikanlah berita gembira kepada orang-orang yang sabar."

Allah Subhanahu Wata'ala telah menetapkan setiap manusia itu pasti diuji dan tidak ada sesiapa yang dapat lari dari kenyataan hidup.

Namun di sebalik semua ujian ini masih ada berita gembira buat hamba-hamba Allah yang terpilih, iaitu mereka yang mampu bersabar menghadapi musibah yang menimpa.

Sesungguhnya sabar menganugerahkan

kesejahteraan, rahmat dan hidayah seperti yang dijelaskan Allah Subhanahu Wata'ala kepada kita tentang ujian hidup dan tuntutan bersabar dalam Surah Al-Baqarah, ayat 157 yang bermaksud :

"Mereka itulah orang yang mendapat keampunan daripada Tuhan mereka dan mendapat rahmatNya dan mereka itulah orang-orang yang mendapat hidayah."

Allah Subhanahu Wata'ala menyediakan ganjaran hebat bagi orang-orang yang mampu bersabar ketika ditimpa musibah seperti firman Allah Subhanahu Wata'ala dalam Surah az-Zumar, ayat 10 yang bermaksud :

"Katakanlah (sampaikanlah firman-Ku ini wahai Nabi Muhammad) : 'Wahai hamba-hambaKu yang beriman! Bertakwalah kepada Tuhan kamu. Orang-orang yang berbuat kebaikan di dunia ini akan mendapat kebaikan (di dunia dan di

akhirat). Dan bumi Allah ini luas (untuk kamu berhijrah). Sesungguhnya hanya orang-orang yang bersabar sahaja akan disempurnakan pahala mereka tanpa batasan."

Selain itu, orang yang sabar juga akan mendapat kelayakan untuk tinggal di syurga.

Seperti firman Allah Subhanahu Wata'ala dalam Surah ar-Ra'd, ayat 23 - 24 yang bermaksud :

"(Iaitu) syurga-syurga 'Adn, mereka masuk ke dalamnya bersama-sama orang-orang yang mengerjakan amalan salih daripada bapa-bapa (dan datuk nenek) mereka dan isteri-isteri mereka serta zuriat keturunan mereka, sedang malaikat-malaikat akan masuk ke tempat-tempat mereka dari semua pintu. (Sambil mengucapkan) : 'Salam ke atas kamu disebabkan kesabaran kamu.' Maka itulah sebaik-baik tempat kesudahan di akhirat."

Kita juga disarankan agar memohon pertolongan daripada Allah Subhanahu Wata'ala untuk terus bersabar dengan bersolat dan berdoa.

Berdoa dan memohon daripada Allah Subhanahu Wata'ala yang mentakdirkan musibah dan ujian tersebut adalah tindakan tepat apabila ditimpa ujian.

Sejajar dengan firman Allah Subhanahu Wata'ala dalam Surah Al-Baqarah, ayat 45 yang bermaksud :

"Dan mintalah pertolongan (kepada Allah atas segala urusan kamu) dengan kesabaran



dan mendirikan sembahyang. Dan sesungguhnya sembahyang itu sangat berat (mendirikannya) melainkan bagi orang-orang yang khusyuk."

Begitu besar tuntutan supaya bersabar dan hikmahnya bagi kita. Jika kita bersikap memberontak, marah dan menyalahkan orang lain tidak akan mampu mengubah takdir mahupun mengelakkan kita dari ditimpa musibah.

Malahan hilangnya kesabaran apabila diuji boleh menyebabkan kita menanggung kerugian. Kerugian yang mengakibatkan sama ada kehilangan, kesedihan, kemalangan atau kematian serta gagal meraih peluang mendapat pahala dan rahmat Allah Subhanahu Wata'ala yang datang bersama musibah tersebut.

Bertindaklah dengan bijak dan sabar kerana ujian dan musibah adalah renech kehidupan. Beruntunglah mereka yang berjaya menghadapinya dengan kesabaran. Kemampuan bersabar dalam menghadapi musibah adalah bukti kesempurnaan iman kita dan bersyukur atas nikmat Allah. Sabar adalah anugerah terindah yang menjanjikan pelbagai kurniaan dan ganjaran di sisi Allah Subhanahu Wata'ala.

"BERTINDAKLAH dengan bijak dan sabar kerana ujian dan musibah adalah renech kehidupan. Beruntunglah mereka yang berjaya menghadapinya dengan kesabaran. Kemampuan bersabar dalam menghadapi musibah adalah bukti kesempurnaan iman kita dan bersyukur atas nikmat Allah. Sabar adalah anugerah terindah yang menjanjikan pelbagai kurniaan dan ganjaran di sisi Allah Subhanahu Wata'ala."